

JHOVÁ DIOS MANDACUSHCATA  
**HUILLAJ**



YACHANAPAJ TEMACUNA  
29 DE MAYO - 2 DE JULIO DE 2017




FOTO:  
**ZAMBIA**

Zambia llajtapimi shuj tutamanta huillanaman llujshicuncuna. Huaququi panicunaca paicunapaj Tandanacuna Huasita cuidashpami Jehová Diosta jatunyachin.

**183.586**  
PUBLICADORCUNAMI  
TIYAN

**415.706**  
GENTECUNAMANMI  
YACHACHINCUNA

**782.527**  
JESÚS HUAÑUSHCATA  
YUYARINGAPAJ  
TANDANACURCACUNA  
(2016)

## CAITAMI YACHASHUN

### 3 29 DE MAYO AL 4 DE JUNIO “Imata rurasha nishcatata pajtachinatajmi cangui”

¿Mashna cutintaj Diosman imata ari nircanchij?  
¿Ari nishcata pajtachingapajca imatataj ruracun-  
chij? ¿Diosman mingarishpa ari nishcatapish, caza-  
rashpa ari nishcatapish pajtachicunchijchu? Cai ya-  
chaipica Jeftepush Anapish paicuna ari nishcata ima  
shina pajtachishcatami ricushun. Paicunamanta ya-  
chashpaca paicuna layallatajmi ruranata munashun.

### 10 5 AL 11 DE JUNIO ¿Dios churashca Mandanaca imatataj tucuchinga?

Ñucanchijcunaca Dios cusha nishca bendicioncu-  
nata yuyarishpami causanchij. Cai yachaipica Jeho-  
vá Dios cai pachata manaraj shuj paradisota ru-  
rashpa imallata tucuchigrishcatami yachashun.  
Caita yachashpaca Diospimi ashtahuan crishun, ima  
llaquicunatapish ahuantashpami catishun.

### 15 12 AL 18 DE JUNIO Cai pachapaj Jueza siempre allita ruran

### 21 19 AL 25 DE JUNIO Llaquicunataca Jehová Dios ricushca shina ricushunchij

Pita llaquichijta ricushpa o ñucanchijta llaquichijpica  
¿humildes cashcata, sinchi crij cashcatachu ricuchi-  
shun? o ¿Diosmanta caruyashunchu? Cai yachaipica  
Bibliapi parlashca quimsa runacunamantami ya-  
chashun. Caita yachashpaca llaquicunata Jehová  
Dios ricushca shinami ricushun.

### 27 26 DE JUNIO AL 2 DE JULIO Tucui shunguhuan rurashpa Jehovata alabashunchij

Diosca ñucanchijmanta imata mana minishtijpipish  
paita servingapaj esforzarijica cushicunmi. Cai te-  
mapica Jueces capítulo 4 y 5-tami yachashun. Cai  
capitulocunata yachashpaca ñucanchij tucui shun-  
guhuan Dios mandashcata rurajpica paica achcata  
valichij cashcatami ricushun.

Tucui muyundij Allpapimi  
Bibliamanta yachachinchij.  
Cai laya revistacunata  
rurangapajca, gentecunami  
shungumanta cullquita  
cushpa ayudan. Cai revistaca  
mana c'atungapajchu.

Shungumanta cullquita cusha  
nishpaca, [jw.org](http://jw.org) paginaman  
yaicui.



Cai revistapi tiyaj versocunataca *Biblia en Quichua Chimborazo*, 2010 huatamantami japishcanchij. QC, 1989 tiyacujpica, *Biblia en Quichua Chimborazo*, 1989 huatamantami japishcanchij. NM tiyacujpica, españolpi *Traducción del Nuevo Mundo de la Santas Escrituras* (con referencias) Bibliamantami japishcanchij.

Cai organizacioncunami cada quilla *Huillaj* revistata llujchincuna (marzo y septiembre quillacunapica ishqui *Huillaj* revistacunatami llujchincuna): Watchtower Bible and Tract Society of New York, Inc.; Presidente: L. Weaver, Jr., Secretario tesorero: G. F. Simonis; 1000 Red Mills Road, Wallkill, NY 12589-3299. Iglesia Cristiana de los Testigos de Jehová, Avenida Cundinamarca, Km. 1 Via Ecopetrol, Facativá-Cundinamarca, Colombia.  
© 2017 Watch Tower Bible and Tract Society of Pennsylvania. Colombiapi rurashca.

April 2017

Vol. 138, No. 6 QUICHUA (CHIMBORAZO)





## “Imata rurasha nishcataca pajtachinatajmi cangui”

“Can pajtachishami nishcataca Jatun Diospaj ñaupajpi pajtachingui” (MATEO 5:33).

JEFTECA alli mandaj, macanacunatapish mana manchaj runami carca. Cutin Anaca humilde huarmimi carca. Paipaj huasipi tucuita alli charishpa, paipaj cusatapish atendishpami causarca. Jeftebish Anapish Diosta alli adorajcunami carca. Ishquindijmi Diosman cusha nishcata pajtachircacuna. Ñucanchijpish imata ruranata Diosman ari nishpaca Jefteca, Anatami yuyarina canchij. Pero ¿imatataj rurana canchij? ¿Diosman ari nishcataca imamantataj pajtachina canchij? ¿Jeftemanta Anamantaca imatataj yachanchij? Cai tapuicunatami cunanca yachashun.

<sup>2</sup> Huaquinpica, Jehová Diostaca, canta ashtahuan servingapajmi caita o chaíta rurasha ninchij. Shinallataj caítami canman cusha nishpami Diosman ari ninchij. Chashnallataj caita o chaíta mana rurashachu nishpami Diosman ari ninchij. Bibliapica imata ruranata Diosman ari ninaca mana pugllaichu can ninmi. Imata ruranatapish shungumantami ari nina canchij. Mana pi

1. a) ¿Jeftebish Anapish imatataj rurarcacuna? (Jahuapi tiyaj dibujota ricui). b) ¿Cai yachaipica imatataj yachagrinchij?
- 2, 3. a) ¿Imata ari nishpaca imatataj rurana canchij? b) ¿Diospaj ñaupajpi imata ari ninamantaca Bibliapica imatataj yachachin?

CANTOCUNA: 18, 7

### ¿IMATATAJ YUYANGUI?

¿Diosman mingarishpa ari ninaca imamantataj valishca can?

¿Cazarangapaj ari ninaca imamantataj mana pugllai can?

Maijancunaca Jehovata ashtahuan servisha nishpami ari nincuna. ¿Chashna ari ninaca imamantataj valishca can?

obligajllapichu ari nina canchij. Chaimanta Diosman ari nishpaca pajtachinatajmi canchij (Génesis 14:22, 23; Hebreos 6:16, 17). Bibliapi nishca shinaca ¿Diosman ari nishcatatac imamantataj pajtachina canchij?

---

## Jeftepish paipaj ushushipish Diosta cazujcuna cashcamantami paicuna ari nishcatatac manataj p'aquircacuna

---

<sup>3</sup> Moisesman cushca leypica: ‘Maijanpish paipaj shimihuan imata rurasha nishcatatac chaitataj rurachun’ ninmi (Números 30:2). Rey Salomonpish cashnami nirca: “Imata ruranata Diosman ari nishpaca, ama uniyashpa pajtachingui. Paica mana pajtachij upa runacunatac mana ricunachinchu. Paipaj imata rurasha nishcatatac pajtachinatajmi cangui” nircami (Eclesiastés 5:4). Jesuspish: “Manapish pajtachingapajca, pajtachishami ama ningui. Ashtahuanpish can pajtachishami nishcatatac Jatun Diospaj ñaupajpi pajtachingui” nircami. Chai shimicunahuanca Jesusca Diospaj ñaupajpi imata ruranata ari ninaca mana pugllai cashcatami yachachirca (Mateo 5:33).

<sup>4</sup> Imata ruranata Diosman ari ninaca mana pugllai cashcatami ricushcanchij. Ari

4. a) ¿Imata ruranata Diosman ari ninaca imamantataj mana pugllai can? b) ¿Jeftemanta Anamantatac imatataj yachashun?

nishcata pajtachishpaca Diospajman ashtahuanmi c'uchuyashun. Pero mana pajtachishpaca paimantami caruyashun. Rey David nishca shinaca, ari nishcata pajtachijcunallami ‘Jehová Diospaj urcumanca huichiyai tucungacuna’ (Salmo 24:3, 4). ¿Anapish Jeftepish imatataj Diosman cusha nircacuna? ¿Paicuna nishcacunata pajtachinaca jahua llachu cashcanga?

### DIOSMAN CUSHA NISHCATAMI PAJTACHIRCACUNA

<sup>5</sup> Amonita gentecunaca israelitacunapaj contrami carca. **Jefteca** paicunahuanmi macanacuna carca (Jueces 10:7-9). Chaimantami Jefteca Yaya Diosta rogashpa cashna mañarca: “Amonitacunata can ñuca maquipi churajpi, mishashpa chaimanta tigrapi ñucata tupanaman ñuca huasimanta punta llujshijca can Mandaj Diospajmi canga” nircami. Diosca Jeftepaj mañaita uyarcami. Chaimantami macanacuita mishachirca. Jefté huasiman tigramujpica paipaj ushushimi tupanaman llujshirca. Paimi ‘Diospaj’ cana carca (Jueces 11:30-34). ¿Diospaj cashcamantatac Jeftepaj ushushica imatataj rurana carca?

<sup>6</sup> Jefté ima nishcata pajtachingapajca paipaj ushushica Diospaj huasipi servinamanmi rina carca. ¿Jefteca mana alli yuyashpachu ñuca huasimanta punta llujshijca Mandaj Diospajmi canga nirca? Mana. Ashtahuanpish paipaj ushushi paita tupanaman shamuna

5. a) ¿Jefteca Diosmanca imatataj cusha nirca? b) ¿Jefté huasiman tigramujpica imataj tucurca?

6. a) ¿Jeftepajpish paipaj ushushipajpish Diosman cusha nishcata pajtachinaca imamantataj mana jahua llachu cashcanga? b) ¿Deuteronomio 23:21, 23-pi; Salmo 15:4-pi nishca shimicunaca imatataj yachachin?

cashcatami ña yuyashcanga. Chashnapish ima nishcata pajtachinaca paipajpish paipaj ushushipajpish sinchimi cashcanga. Jefteca paipaj ushushita ricushpaca shungu paquirishca shinami sintirirca. Paipaj ushushipish huacanamanmi rirca. ¿Imamantataj huacanaman rirca? Paica “mana cazarashpa” huahuacunata mana charishpami tucui vida Diospaj huasipi causana carca. Jeftepeish shujtaj huahuacunata mana charishcamantami paipaj familiapaj shutica chingarina carca. Pero Jeftepeish paipaj ushushipish mana paicunallapi yuyajchu carca. Ashtahuanpish Jefteca: “¡Mandaj Diosman ñuca shimihuantaj nishcataca maitataj paquishari!” nircami. Paipaj ushushipish: “Cambaj shimihuan Diosman imata cusha nishca cashpaca ñucata cushpa pajtachilla” nircami (Jueces 11:35-39). Jeftepeish paipaj ushushipish Diosta cazujcunami carca. Chaimantami sinchi ricurijpipish paicuna pajtachisha nishcataca Diospaj ñaupajpi manataj paquiracuna (**Deuteronomio 23: 21, 23; Salmo 15:4-ta leyipai**).

<sup>7</sup> **Anaca** llaqui causaitami charirca. Paica huahuacunata mana chari tucurcachu. Chaimantami paita p'ñashpa burlajcuna carca (1 Samuel 1:4-7, 10, 16). Chashna burlajpimi llaquilla sintirishpa Diosta cashna mañarca: “Tucuita Mandaj Dios, cambajta ruraj ñuca llaquihuan cajta ricuhuayari. Cambajta ruraj ñucataca amataj cungarichu. Ashtahuanpish cambajta rurajmanca shuj c'ari huahuata cuhuai. Ñucaca paitaca paipaj tucui causaipi can Mandaj Diospaj cachunmi canman cu-

7. a) ¿Anaca ima shinataj causacurca? b) ¿Anaca imatataj Diosman cusha nirca? c) ¿Jehová Diosca Ana mañashcataca ima shinataj cutichirca? d) ¿Ana ari nishcamantaca Samuelca imataj tucuna carca? (Notata ricui).

sha. Paipaj ajchatapish manataj p'itichishcami canga” nircami\* (urapi tiyaj notata ricui) (1 Samuel 1:11). Jehová Diosca Ana chashna mañajpica cutichircami. Chaimantami catij huataca Anaca shuj huahuata charirca. Paica: “Mandaj Diosta mañajpi, paimi cai huahuataca cun nishpami Samuelta shutichirca”. Anaca huahuata charishpapish Diosman cusha nishcataca mana cungarircachu (1 Samuel 1:20).

---

## Sinchi ricurijpipish Anaca pai ari nishcata pajtachircami


---

<sup>8</sup> Anaca Diosman cusha nishcataca mana cungarircachu. Chaimantami paipaj churi Samuel ña quimsa huatacunata charijpi Siló llajtapi tiyaj Diospaj huasiman pusharca. Chaiman chayashpaca Elí curapaj ñaupajpica: ‘Cai huahuata cunchunmi mañacurcani. Mandaj Diosca ñuca mañashcata curcami. Chaimanta ñucapish cai huahuataca pai Mandaj Diosmanmi cuni. Paica tucui paipaj causaipimi Mandaj Diospaj canga’ nircami (1 Samuel 1:24-28). Chai punllamantami Samuelca Diospaj huasipi causarca. Bibliapica: “Samuelca Mandaj Diospaj ñaupajpimi huiñarca” ninmi (1 Samuel 2:21). Anaca paipaj huahua ima shina huiñajta mana ricunata

---

\* Anaca Diosmanca, ‘shuj huahuata charishpaca canmanmi cusha’ nircami. Cai huahuami nazareo tucushpa Diospajllata rurangapaj ch'icanyachishca carca (Números 6:2, 5, 8).

8. a) ¿Ari nishcata pajtachinaca imamantataj Anapajca sinchi carca? b) ¿Salmo 61-pica Anamantaca imatataj nin?



## ¿Jehovaman ari nishcacunata pajtachicunguichu?

Diosman mingarishpa  
ari nina  
(Párrafo 10-ta ricui).

Diosta ashtahuan  
servingapaj ari nina  
(Párrafo 19-ta ricui).

Cazaracushpa  
ari nina  
(Párrafo 14-ta ricui).

yachashpa, paihuan mana causana cashcata yachashpa llaquirishcangami. Chaimanta pai-paj nishcata pajtachina sinchimi cashcanga. Sinchi ricurijpipish pai ima nishcata pajtachircami (1 Samuel 2:1, 2; **Salmo 61:1, 5, 8-ta leyipai**).

<sup>9</sup> Ima shinami ricushcanchij imata ruranata Diosman ari ninaca mana pugllaichu can. Cunanca cai tapuicunatami yachashun: ¿Testigocunaca imallapitaj Diosmanca ari ninchij? ¿Ñucanchij rurasha nishcataca imamantataj pajtachina canchij?

9. ¿Ima tapuicunataj cunanca yachashun?

## DIOSPAJLLA CAUSASHA NISHPA MINGARINAMANTA

<sup>10</sup> Ñucanchijpajca Diosman mingarinami tucuimanta yalli valishca can. Diosman mingaringapajca ñucanchijlla cashpami, ‘ima llaquicuna ricurijpipish ñuca tucui causaipimi canllata servisha’ nishpa Diosta mañanchij. Jesusca ‘cancunapaj causaitaca ama llaquichijchu’ nircami. Chaimantami Diosman mingaringapaj paita mañacushpaca, ‘ñuca munaita ña mana rurashachu, ashtahuanpish

10. a) ¿Ñucanchijpajca tucuimanta yallica imataj ashtahuan valishca can? b) ¿Yaya Diosman mingarishpaca imatataj ricuchinchij?

cambaj munaita rurashpami causasha' ninchij (Mateo 16:24). Diosman mingarishca punllamantami 'Diospaj canchij' (Romanos 14: 8, NM). Chaimanta Jehová Diosman mingarinaca mana pugllaichu can. Ñucanchijca Salmo 116:12, 14-ta quillcaj runa shinami sintirinchij. Paica cashnami nirca: "Ñucapaj tucui allicunata rurashcamantaca, Mandaj Diosmanca ¿imatataj cushari? Cunanca Mandaj Diosman cushatajmi nishcacunataca cushami. Tucui paipaj cajcunapaj ñaupajpimi cusha" nircami.

<sup>11</sup> ¿Ñachu Diosman mingarishpa, bautizarircangui? Chaita rurashca cashpaca alli decisiontami japishcangui. ¿Can bautizarishca punllapi ima conferenciata cushcata yuyaringuichu? Conferenciata cuj huauquica: "¿Tucui ñuca causaihuanmi canta servisha nini nishpa Jehová Diosta mañashcanguichu?" nishpami tapushcanga. Shinallataj '**¿Diosman mingarishpa, bautizarishpaca testigo de Jehová cashcata** alli entendinguichu?' nishpami tapushcanga. Chashna tapujpi ari nishpa cutichijpimi chaipi tandanacushcacunaca Diosman mingarishcata ricushcangacuna. Shinallataj bautizingapaj, testigo de Jehová cangapaj tucui requisitocunata ña pajtachishcatami ricushcangacuna. Bautizarijpica Yaya Diosca cushillami sintirishcanga.

<sup>12</sup> Jehová Diosllata servisha nishpa, pai mandashcacunata cazusha nishpami bautizarircanchij. Pero mana chaillapichu saquirina canchij. Chaimantami ñucanchijca: "¿Bautizarishca punllamanta Diospajman ashtahuan c'uchuyashcanichu? ¿Paita tucui shungu-

11. ¿Bautizarishpaca imatataj ricuchinchij?

12. a) ¿Bautizarishca cashpapish imacunatataj yuyarina canchij? b) ¿Apóstol Pedroca imatataj rurashpa caticij nirca?

huan servishpa caticunichu?" (Colosenses 3: 23, NM). "¿Jehová Diostaca punllantachu mañani? ¿Bibliataca tucui punllacunachu leyini? ¿Tucui tandanacuicunamanchu rini? ¿Siemprechu huillanaman llujshini? ¿Diospajta runataca shaicunichu?" nishpami yuyarina canchij. Apóstol Pedroca, Diospajta ruranata shaicushpaca 'quillami tucunguichij' nircami. Pero Diosmanta ashtahuan yachashpa, paita ashtahuan c'uyashpa, sinchi crij cangapaj esforzarishpaca mana 'quilla' tucushunchu (**2 Pedro 1:5-8-ta leyipai**).

<sup>13</sup> Jehová Diosllata servisha nishca cashpaca ña mana huashaman tigrari tucunchijchu. Maijanpish Diosta servinata shaicushpaca: "Diosmanca mana shungumanta mingarircanichu, ñuca bautizarishcaca mana valinchu" nishpa mana yuyanachu can\* (urapi tiyaj notata ricui). Chai c'ari o huarimi jatun juchata rurashpaca, Diospaj ñaupajpi, congregacionpaj ñaupajpimi imata rurashcata 'ricuchina tucunga' (Romanos 14:12, *El Nuevo Testamento Quichua, Nueva Versión Internacional*, 1999). Jesusca huaquin crijcunataca: Jehová Diosta 'punta c'uyashca shinaca ña mana c'uyacunguichijchu' nircami. Ñucanchijtapish chashna nichunca mana munanchijchu, ashtahuanpish Jesús cashna nichunmi munanchij: 'Ñucaca can imallata rurashcatapish, c'uyaj cashcatapish, crij cashcatapish, allita ruraj cashcatapish, llaquicunata apai tucushcatapish yachaniami. Shinallataj can ruracushcacunaca callaritapish yalli ashtahuan alli cashcatapish yachaniami' nichun (Apocalipsis 2:

\* Maijanpish bautizarisha nijpica, bautizingapaj requisitocunata pajtachishcata o mana pajtachishcatami ancianocunaca alli ricuna can. Chaimantami shuj c'aripaj o huarmipaj bautismoca huaquinllapi mana valishca shina ricuri tucun.

13. ¿Diosman mingarishca, bautizarishca cashpaca imatataj yuyarina canchij?



4, 19). Ñucanchijca Jehová Diosllata servisha nishpami paiman mingariranchij. Chaita pajtachijpica Diosca cushicungami.

### CAZARANGAPAJ ARI NINAMANTA

<sup>14</sup> Diosman mingarina tucuimanta yalli valishca cashcatami yachashcanchij. Pihuan cazaranata ari ninapish Diospaj ñaupajpica achca valishcami can. Mana pugllaichu can. Noviocunaca Diospaj ñaupajpi, compañajcunapaj ñaupajpimi ari nincuna. Paicunaca: **‘Dios mandashca shinami huañungacama** ishquindijmanta c’uyanacushpa, cuidanacushpa, respetanacushpa causashun’ nishpami ari nincuna. Huaquin noviocunaca mana chai shimicunallataj ningacunachu. Shinapish Diospaj ñaupajpimi ari nincuna. Chai punllamantami noviocunaca cusa huarmi cancuna. Cazarashcacunaca tucui causaipimi tandalla causana can (Génesis 2:24; 1 Corintios 7:39). Jesuca: “Taita Dios tandachishcataca, ni pi amataj ch’icanyachichun” nircami. Chaimantami cazaragrijcunaca, ‘ima llaqui ricurijpica divorciarishunllami’ nishpa mana yuyana can (Marcos 10:9).

<sup>15</sup> Tucuicunami juchayujcuna canchij. Chaimantami Bibliapi nishca shinaca huaquinpica cazadocunapish llaquicunata charin (1 Corintios 7:28). Cunan punllacunapica achca gentecunapajca matrimonioca mana valishca layami ricurin. Paicunaca ‘mana alli causashpaca divorciarinallami canchij’ nishpami yuyancuna. Pero ñucanchijca mana chashna yuyanchijchu. Cazadocunaca Diospaj ñaupajpimi ari ninacurca. Chaita mana

14. a) ¿Ima shujtaj ari nishcataj Diospaj ñaupajpica valishca can? b) ¿Pihuan cazaranata ari ninaca imamantataj mana pugllai can?

15. ¿Matrimoniomantaca ima panda yuyaicunatatataj mana charina canchij?

pajtachishpaca Diosman llullashca shinami ricurinman. Llullacunataca Diosca piñanmi (Levítico 19:12; Proverbios 6:16-19). Cazadocunaca apóstol Pablo ima nishcata yuyarinami can. Paica: “¿Cazarashcachu canguí? Shinashpaca ama huarmita shitanata yuyanguí” nircami (1Corintios 7:27). ¿Imamantataj Apóstol Pabloca chashna nirca? Divorciarinaraiculla huainayajcunata Jehová Dios piñashcata yachashcamantami paica chashna nirca (Malaquías 2:13-16).

<sup>16</sup> Bibliapi yachachishca shinaca maijanpish huainayajpi, cusa cashpa o huarmi cashpa mana perdonajllapimi divorciari tucuncuna (Mateo 19:9; Hebreos 13:4). Cutin, ¿mana divorciarishpa cusamanta o huarmimanta separarinamantaca Bibliaca imatataj nin? Bibliapi **1 Corintios 7:10, 11-ta leyipai**. Bibliapica caimanta o chaimanta separarinatajmi canguí nishpaca mana huillanchu. Chashna cajpipish maipica shuj huauqui o shuj panica, ‘ñuca cusamanta o huarmimanta separarishpallami alli casha’ nishpachari yuyanga. Por ejemplo, huaquincunaca cusa o huarmi maltratajpimi ‘ñuca causaica **peligropimi can**’ nishpa separinata yuyashcacuna. Shujtajcunaca cusa o huarmi yachashca jahua Diospaj contra tucushpa paicunata **Diosmanta caruyachinata manchashpami** separinata yuyashcacuna\* (urapi tiyaj notata ricui).

<sup>17</sup> ¿Cusandij huarmindij alli causangapaj shuj consejota mañajpica ancianocunaca imatataj rurana can? Ancianocunaca pai-

\* “*Manténganse en el amor de Dios*”, libropi páginas 219-221-ta ricui.

16. ¿Divorciarinamanta, separarinamantaca Bibliaca imatataj yachachin?

17. ¿Cazarashcacuna alli causangapajca imatataj rurana can?



cunataca: “¿Shungumanta c'uyangapajca imataj ayudanga? videota ¿ricushcanguichijchu? Cambaj familiaca cushillami causai tucun folletotapish ¿leyishcanguichijchu?” nishpami tapui pudincuna. Cai publicacioncunapi cazarashcacuna alli causachunmi achca consejocuna tiyan. Shuj matrimonioca: ‘Cai folletota estudiashcamantami ashtahuan cushilla causanchij’ nircami. Cutin shujtaj panica 22 huatacunata cazarashca cashpapish paipaj cusahuanca achca problemacunatami charirca. Pero ¿Shungumanta c'uyangapajca imataj ayudanga? videota ricushca q'ui-paca cai panica cashnami nirca: ‘Ishquindij bautizarishca cashpapish ch'icanyarishca shinami ricurircanchij. Pero minishticuj horami cai videota chasquircanchij. Chaimantami cunanca ashtahuan alli causanchij’ nircami. Jehová Dios cushca consejocunata catishpaca cazarashcacunaca ashtahuan alli, cushillami causanga.

### **DIOSTA ASHTAHUAN SERViNGAPAJ ARI NINAMANTA**

<sup>18</sup> Callaripica Jeftemanta Anamantami yacharcanchij. Paicunaca Diosman cusha nishcata pajtachircacunami. Chaimantami Jefte-paj ushushipish Anapaj churipish paicunapaj tucui causaipi Diosta servishpa causarcacuna. Cunan punllacunapish achca yaya mamacunami paicunapaj churicunata ushushicunata Jehová Diosta tucui tiempo servichun animashcacuna. Chaimantami precursores cachun, Betelpi servichun o shujtaj ruraicunapi servichun animashcacuna. Ñucanchijpish jovencunataca Jehová Diosta servishpa catichunmi animai tucunchij (Jueces 11:40, NM; Salmo 110:3).

18, 19. a) ¿Achca yaya mamacunaca imatataj rurashca? b) ¿Achca huauquicuna panicunaca imata-taj Diosman ari nishcacuna?

<sup>19</sup> Cunan punllacunapica casi 67.000 huauquicuna panicunami ch'ican ch'ican ruracunapi Jehová Diosta ashtahuan servicunacuna. Paicunamanta huaquincunaca Betelpi, Jatun Tandanacuna Huasicunapimi servicunacuna. Shujtajcunaca superintendentecuna, misionerocuna, precursor especialcunami can. Cutin shujtajcunaca Tandanacuna Huasicunata, Jatun Tandanacuna Huasicunata, Betel Huasicunata shayachishpami ayudancuna. Shujtajcunapish Bibliamanta yachachij escuelacunata organizashpa, chaipi yachachishpami ayudancuna. Cai tucui huauqui panicunaca: ‘Jehová Diosta servingapaj imata rurachun mañajpipish tucui shunguhuan rurashunllami, minishtirishca cosascunallahuan causashunllami’ nishpami ari nishcacuna. Shinallataj ‘permisota cujllapimi cullquita ganangapaj shuj trabajota charishun’ nishpami ari nishcacuna. Cai huauquicuna panicunaca ñucanchij layallatajmi can. Pero paicunapaj ruracushcacunaca achca valishcami can. Cai huauquicuna panicunaca mana jatun tucushpami paicuna ari nishcata pajtachishun nishcacuna.

<sup>20</sup> Cai yachaipica quimsa laya ari ninamantami yachashcanchij. Ñachari shujta pajtachircanchij. Yuyarishunchij Diospaj ñaupajpi ari ninaca mana pugllaichu can. Ari nishcataca pajtachinatajmi canchij (Proverbios 20:25). Pero mana pajtachijpica ñucanchijllatajmi llaqui tucushun (Eclesiastés 5:6). Ash-tahuanpish Salmota escribij runa shina cashunchij. Paica: ‘Jehová Diospaj shutitaca cantacushallami. Ñuca imalla cuna tucushcunatapish punllantami cucushalla’ nircami (Salmo 61:8).

20. a) ¿Diosman ari nishpaca imatataj rurana canchij? b) ¿Imamantataj Diosman ari nishcata pajtachina canchij?



## ¿Dios churashca Mandanaca imatataj tucuchinga?

*“Cai pachaca, tucui munaicunandijmi chingaricun. Ash-tahuanpish Diospaj munaita rurajca, huiñaitami causanga”*  
(1 JUAN 2:17).

CANTOCUNA: 55, 24

### ¿YUYARINGUICHU?

¿Millai organizacioncunata-pish, millai gentecunatapish Diosca imatataj ruranga?

¿Llaqui causaitapish, millai ruraicunatapish Diosca imatataj ruranga?

¿Llaqui causai tucurijpi quish-piringapajca imatataj rurana canchij?

CAITA yuyashun. Shuj millai runami carcelpi can. Chai millai runatami huañuchingapaj guardiacunaca shujtaj ladoman apacun. Chai runa sano, mana ima tucushca laya cajpipish paica huañunami can.

<sup>2</sup> Cai millai runa ñalla huañugrij shinallatajmi cai mundopi tiyaj millai ruraicunapish ñalla tucuringa. Bibliapica: “Cai pachaca, tucui munaicunandijmi chingaricun” ninmi (1 Juan 2:17). Jehová Diosca ñallami millai ruraicunata tucuchinata decidishca. Chaica pajtaringatajmi. Cutin chai millai runamanta parlashun. Huaquin gentecunaca chai millai runata ama huañuchichunllami, yangamanta juchachishpa carcelpi churashcacuna nincuna. Pero Jehová Diosca cashcata ruraj Diosmi can. Chai mantami millai ruraicunata tucuchinga (Deuteronomio 32:4). Cai mundopi mana alli causaica ñallami tucuringa, mana uniyangachu. Chai punlla chayamujpica jahua pachapi causajcu-

1, 2. a) ¿Cai mundopi tiyaj millai ruraicunaca imamantataj shuj millai runa ñalla huañugrij shina can? (Jahuapi tiyaj dibujota ricui). b) ¿Yaya Dios millai ruraicunata tucuchijpica jahua pachapi causajcunapish, cai Allpapi causajcunapish ima shinashi sintiringacuna?

napish, cai Allpapi causajcunapish, ‘Diosca cashcata ruraj cashcamantami tucui millai ruraicunata tucuchina carca’ ningacunami. Chaita yachashpaca ¿manachu cushilla sintirinchi?

<sup>3</sup> Bibliapi ‘cai pacha chingaricun’ nishpaca cunan tiempopi tiyaj tucui millai ruraicuna ñalla tucurina cashcatami nicun. Caica shuj ‘alli huillaimi’ can ¿nachu? (Mateo 24:14). Cai yachaipica Dios churashca Mandana chayamujpi, mana alli gentecuna, millai organizacioncuna, millai ruraicuna, llaqui causaipish tucurina cashcatami yachashun. Shinallataj ñucanchijpish cai tucui llaquicuna tiyashcamanta ima shina causacushcata, Jehová Dios imata ruragrijtapishmi yachashun.

### MILLAI GENTECUNA

<sup>4</sup> ¿Millai gentecuna tiyashcamantaca ima shinataj causanchij? Apóstol Pabloca: “Cai punllacuna tucurinapajca llaqui punllacunami shamunga”, gentecunapish ashtahuanmi millaicuna tucunga nircami (2 Timoteo 3:1-5, 13). Cai shimicunaca cunan punllacunapimi pajtaricun. Chaimantami shuhuacuna, llaquichijcuna tiyan. Yana, yuraj cajpipish piñancunami. Huaquincunacarin mana alli cosascunata rurashpashpish mana pingarincunachu. Cutin shujtajcunaca nij tucushpallami ayudaj tucuncuna. Ñucanchijta mana llaquichishca cajpipish, chaita ricushpaca llaquillami sintirinchi ¿nachu? Chashnallataj huahuacunapish yuyajcunapish shujtaj gentecunapish mana defindiri tucushcamantami paicunata yallitaj llaquichincuna. Cutin shujtajcunaca animalcuna shina, demoniocuna shinami comportarincuna (Santiago

3. ¿Dios churashca Mandanaca imatataj tucuchinga?
4. ¿Millai gentecuna tiyashcamantaca ima shinataj causanchij?

3:15). Pero Diospaj Shimipica alli huillaicunami tiyan.

<sup>5</sup> ¿Jehová Diosca imatataj ruranga? Diosca millai gentecuna paicunapaj causaita cambiachunmi tiempota cucun (Isaías 55:7). Cai mundopi tiyaj millai ruraicuna ñalla tucurigrijpipish Diosca gentecunataca manaraj juzgashcachu. Pero ‘jatun llaqui punllacuna’ chayamungacama millai gentecuna mana cambiasha nijpica ¿imatataj tucunga? Jehová Diosca paicunataca tucuchisha ninmi (**Salmo 37:10-ta leyipai**). Cunan punllacunapi achca gentecunaca mana allita rurashpaca pacancunami. Paicunapaj rurashcacunata pi mana yachaj chayajpica ima mana rurashca layami purincuna (Job 21:7, 9). Pero Bibliapica cashnami nin: ‘Diospaj ñahuicunaca runa maita purishcatami chaparacun. Chaqui sarushcatapish tucuitami ricuracun. Millaita rurajcuna miticurinapajca, manchanana amsapish, huañuna amsapish mana tiyanchu’ ninmi (Job 34:21, 22). Chaimanta Diospaj ñaupajpica tucui ricurin. Paica tucui millaicunapaj ruraicunatapish ricunmi. Armagedón quipaca millai gentecunaca ña mana tiyangachu. Paicunataca cutinca ña mana ricushunchu (Salmo 37:12-15).

<sup>6</sup> ¿Millaicuna tucurijpica picunataj causashpa catinga? Diosca: ‘Alli shungucunami, Dios cusha nishca Allpatataca japingacuna. Yallitaj sumaj causaipimi cushicungacuna’ ninmi. Chashnallataj, ‘cashcata rurajcunallami Allpataca japingacuna. Tucui causaipimi Allpapi causangacuna’ ninmi (Salmo

5. a) ¿Diosca imamantataj tiempota cucun? b) ¿Paicunapaj causaita mana cambiasha nijcunahuanca imataj tucunga?
6. a) ¿Millaicuna tucurijpica picunataj causashpa catinga? b) ¿Allicunalla cai Allpapi causanata yachashpaca ima shinataj sintirinchi?

37:11, 29, NM). ¿Picunataj cashcata rurajcuna, alli shungucuna can? Alli shungucunaca humilde gentecunami can. Paicunaca humildes cashcamantami Diosmanta yachashpa paita cazuncunapish. Shinallataj Dios munashca shina causasha nishcamantami cashcata rurajcunapish can. Cunan punllacunapica alli gentecunaca ashallami tiyan. Pero Dios cugrij paradisopica **alli shungu gentecunalla, cashcata ruraj gentecunallami** causanga. Paicunami cai Allpatata shuj sumaj paradisota ruranga.

### MILLAI ORGANIZACIONCUNA

<sup>7</sup> **¿Millai organizacioncuna tiyashcamantaca ima shinataj causanchij?** Paicunapaj culpamantami cai mundopica achca llaquicuna tiyan. Por ejemplo, panda religioncunapica achca gentecunamanmi Diosmanta llullashpa yachachincuna. Shamuj punllacunapi ima tucunatapish llullashpami yachachincuna. Biblia ima nishcatapish mana crinachu canchij nishpami yachachincuna. Cutin mana alli gobiernocunaca shujtaj llajta-cunahuan macanacushpami gentecunata llaquichincuna. Pobrecunatapish mana definidiri tucushcamantami llaquichincuna. Ashtahuanpish cullquiraicu imatapish rurashpami ashtahuan charij tucuncuna. Jatun empresacunapish charij canallata munashpami Allpata mapayachishpa catincuna. Pobre gentecunatapish sinchita trabajachishpa, mana alli pagashpami paicunalla charij tucuncuna. ¿Manachu cai millai organizacioncunamanta achca llaquicuna tiyan?

#### <sup>8</sup> **¿Jehová Diosca imatataj ruranga?**

7. ¿Millai organizacioncuna tiyashcamantaca ima shinataj causanchij?

8. ¿Biblia nishca shinaca millai organizacioncunahuanca imataj tucunga?

Tucui panda religioncunata gobiernocuna llaquichijpimi 'jatun llaqui punllacunaca' callaringa. Chai panda religioncunataca Bibliapica shuj huainayaj huarmihuanmi ch'imbapuran. Chai huainayaj huarmica Babilonia jatun pueblomi can (Apocalipsis 17:1, 2, 16; 18:1-4). Chai tucui panda religioncunaca tucui chingaringa. Cutin ¿shujtaj organizacioncunahuanca imataj tucunga? Diospaj Shimipica: 'Chai organizacioncunaca urcucuna shina, cucha chaupipi tiyaj allpacuna shinami sinchi ricurin' ninmi (**Apocalipsis 6:14-ta leyipai**). Pero Dios churashca Mandanata mana apoyashcamantami gobiernocunapish, shujtaj organizacioncunapish tucuchishca cangacuna. 'Jatun llaqui punllacunaca' ña tucurigrijpimi chaica pajtaringa (Jeremías 25:31-33). Chai quipaca millai organizacioncunaca shujllapish ña mana tiyangachu.

<sup>9</sup> **¿Armagedón jatun macanacui quipaca shujtaj organización cai Allpapi tiyangachu?** Diospaj Shimipica: 'Ñucanchijca, pai rurasha nishca shinallataj mushuj jahua pachata, mushuj cai pachatami shuyacunchij. Chaipica tucucunami cashcata rurajcunalla canga' ninmi (2 Pedro 3:13). 'Mauca jahua' pacha nishpaca millai gobiernocunatami nin. Cutin 'mauca cai pacha' nishpaca gobiernocunapaj maquipi caj gentecunatami nin. ¿Chai millai gobiernocuna tucurijpica pitaj mandanga? Bibliapica mushuj jahua pacha nishpaca mushuj gobiernomantami parlan. Cai gobiernopica Jesucristomi mandanga. 144 mil ungidocunapishmi Jesushuan mandanga. Cutin 'mushuj cai pacha' nishpaca Jesús mandagrij alli gentecunamantami

9. ¿Cai Allpa tucui ordenpi cachunca Jehová Diosca imatataj ruranga?



parlan. Jehová Diosca tucuita allí charij Diosmi can. Chaimantami Jesuspish ungidocunapish Jehová Dios shina gentecunata allí mandanga (1 Corintios 14:40). Cai Allpatica huaquin c'aricunapish Jesús nishcata, ungidocuna nishcata uyashpami ñaupajman pushangacuna (Salmo 45:16). Dios churashca Mandanalla cai Allpata mandajpica millai ruraicunapish mana tiyangachu. Chaipica tucucunami tandalla, cushilla causashun. Chaita yachashpaca ¿manachu cushilla sintirinchij?

### MILLAI RURAICUNA

<sup>10</sup> ¿Millai ruraicuna tiyashcamantaca ima shinataj causanchij? Cai pachapi gentecunaca huainayashpalla, shuhuashpalla, macanacushpallami causan. Televisionpi, Internetpipish mana allí ruraicunataca allí cashcata shinami ricuchin. Gentecunapish Diospaj mandashcacunataca yangapimi churashcacuna (Isaías 5:20). Chaimantami yaya mamacunaca paicunapaj huahuacuna mana allí ruraicunamanta cuidarichun ayudana can. Ñucanchijpish Diospaj mandashcacunata mana cazusha nijcuna shinaca mana casha ninchijchu. Ashtahuanpish Diospajman c'uchuyangapajmi achca esfuerzota rurana canchij.

<sup>11</sup> ¿Jehová Diosca imatataj ruranga? Sodoma, Gomorrapi causajcuna mana allita rurashpa causashcamanta Jehová Dios paicunata imata rurashcata yuyarishun (**2 Pedro 2:6-8-ta leyipai**). Lotca cashcata ruraj runami carca. Paipaj familiaca millai gentecu-

10. a) ¿Cambaj llajtapica ima llaquicunataj tiyan?  
b) ¿Llaquicuna tiyashcamantaca canpish, cambaj familiapish ima shinataj causanguichij?

11. ¿Sodoma, Gomorrapi causajcunata Dios chingachishcamantaca imatataj yachanchij?

napaj chaupipi causacushcamantami llaquicunata aparacuna. Jehová Diosca chai millai gentecunata tucuchircami. Quipa punllacunapish Diosta mana manchashpa causajcunatapish, ima shina llaquichina cashcata ricuchingapajmi chashna rurarca. Ima shinami Lot causacun punllacunapi huainayaj gentecunata chingachirca, chashnallatajmi millaita rurajcunataca Diosca chingachinga.

<sup>12</sup> ¿Millai ruraicuna tucurijpica causaica ima shinashi canga? Paraíso Allpatica achca trabajomi tiyanga. Por ejemplo, cai Allpaj sumaj, verdijlla cachunmi tucucuna tandalla cushilla trabajashun. Ñucanchijpish, shujtajcunapajpish huasicunatami shayachishun. Huañushcacuna causarijpica paicunatapish chasquishunmi. Ashtahuancarín paicunamanca Diosmantami yachachishun, pai ñucanchijmanta tucuita rurashcatapishmi yachachishun (Isaías 65:21, 22; Hechos 24:15). Paraíso Allpatica ima trabajota rurashpish cushillami causashun, Jehová Diostapish jatunyachishunmi.

### LLAQUI CAUSAI

<sup>13</sup> ¿Llaqui causai tiyashcamantaca ima shinataj causanchij? Millai organizacioncuna tiyashcamanta, millai ruraicuna tiyashcamantami llaqui causai tiyan. Chashnallataj guerracuna, huañuicuna, unguicuna, pobreza tiyashcamantapishmi llaqui causanchij. Yana o yuraj cashcamanta piñajpipish llaquillami causanchij. ¿Imamantataj chashna causanchij? Diablopish, Adanpish Evapish Diosta mana cazushcamantami chashna llaqui causaica tiyai callarirca.

12. ¿Millai ruraicuna tucurijpica imatataj rurasha ninqui?

13. ¿Diablopish Adanpish Evapish Diosta mana cazushcamantaca ima shinataj causanchij?

**14 ¿Jehová Diosca imatataj ruranga?** Llaqui causai ama tiyachun Jehová Dios imata ruragrija yuyarishun. Paica guerracuna natami tucuchinga (**Salmo 46:8, 9-ta leyipai**). Ungüicunatapish tucuchingami (Isaías 33:24). Huañuitapish huiñaipajmi chingachinga (Isaías 25:8). Pobrecunapish ña mana tiyangachu (Salmo 72:12-16). Diosca tucui llaqui causaitami tucuchinga. Diablo paipaj demoniocunapish ñucanchijta umashpa llaquichichunca mana saquingachu (Efesios 2:2).

**15 ¿Guerracuna, ungüicuna, huañuicuna tucurijpica causaica ima shinashi canga? Causaica sumajmi canga. Macanacungapaj armacunapish soldadocunapish mana tiyan-**

14. ¿Llaqui causai ama ashtahuan tiyachunca Diosca imatataj ruranga?

15. ¿Armagedón macanacui q'ui-paca imataj mana tiyanga?

¿Macanacuicuna, ungüicuna, huañuicuna tucurijpica ima shinashi causaica canga?

(Párrafo 15-ta ricui).



gachu. Shinallataj hospitalcunapish, doctorcunapish, enfermerocunapish, cementeriocunapish mana tiyangachu. Pi shuhuaicuna mana tiyashcamanta policiacunapish mana tiyangachu. Huasicunatapish ña mana candadohan charishunchu. Tucui llaquicunaca tucuchishcami canga.

**16 ¿Llaqui causai tucurijpica ima shinataj sintirishun?** Huahuamantapacha llaquicunahuan causashcamantami ña amañarishca laya canchij. Chaimantami paradisopi ima shina causai tiyanata yuyanaca sinchi can. Por ejemplo, huaquin gentecunaca carro shayarina c'uchullapimi causancuna. Ña amañarishca cashcamantami bullata mana sintincuna. Cutin shujtaj gentecunaca basurata shitana c'uchullapimi causancuna. Chai basura jiru ashnaipish mana sintincunachu. Pero bullacuna, mapa ashnaicuna tucurijpica ¿manachu chai gentecunaca tranquilo, cushilla causai pudingacuna? Ari. Llaqui causaita, mapa causaita Jehová Dios tucuchijpica ñucanchijpish cushillami causashun.

**17** Salmo 37:11-pi nishca shinaca tucucunami cushilla, sumajta causashun. Jehová Diosmi chashna causachun munan. Chaimanta cai llaqui punllacunapi causashpapish Jehová Diosmanta, paipaj pueblo-mantapish amataj caruyashunchijchu. Ashtahuanpish shamuj punllacunapi sumaj causai tiyana cashcata yuyailami causana canchij. Muscuillami can nishpa ama yuyashunchijchu. Shujtaj gentecunamanpish cai sumaj causai tiyanata huillashunchij (1 Timoteo 4: 15, 16; 1 Pedro 3:15). Chaita rurashpaca huiñaitami cushilla causashun.

16, 17. a) ¿Llaqui causai tucurijpica ima shinataj sintirishun? b) ¿Quishpiringapajca imatataj rurana canchij?



## Cai pachapaj Juezca siempre allita ruran

*‘Paica ñucanchij jatun Rumi shinamari. Pai rurashcacunapica ima panda mana tiyanchu. Paipaj ñancunapish ima mana pandachu’ (DEUTERONOMIO 32:4).*

ABRAHAMCA Diostaca: “Canca tucui cai pachapaj Juez cashcamanta imatapish cashcatatajmi rurangui” nircami (Génesis 18:25). ¿Imamantataj Abrahamca chashna nirca? Dios cashcata ruraj cashcamanta Sodoma Gomorra llajtacunata alli juzganatami circa. Shinallataj cashcata rurajcunata millai gentecunahuan tandachishpa Jehová mana chingachij cashcatami circa. Bibliapi Jehovamanta parlashpaca cashnami nin: ‘Paica ñucanchij jatun Rumi shinamari. Pai rurashcacunapica ima panda mana tiyanchu. Paipaj ñancunapish ima mana pandachu’ ninmi (Deuteronomio 31:19; 32:4).

<sup>2</sup> Jehová Diosca imatapish siempre alli ruran. Diospaj mandashcacunaca tucui allí can. Chaimantami imatapish allí ricushpa juzgan. Paimi tucui manta yalli, cashcata ruraj can. Bibliapica ‘Diosca cashcata ruranata, imatapish allita ruranatami c’uyan’ ninmi (Salmo

1. ¿Cashcata ruraj Diosmantaca Abrahamca imatataj nirca? (Jahuapi tiyaj dibujota ricui).

2. ¿Imamantataj Diosca siempre allita ruran?

CANTOCUNA: 2, 11

¿PI ÑUCANCHIJTA  
LLAQUICHIJICA  
IMAMANTATAJ CAI  
VERSOCUNATA  
YUYARINA CANCHIJ?

Miqueas 7:7

Proverbios 19:3

Mateo 18:15

33:5). Chaimantami Abrahamca Jehovataca, ‘cashcata ruraj Diosmi canguí’ nirca.

<sup>3</sup> Diosca imatapish allita ruraj cashcata yachashpami cushilla sintirinchij. Pero achca gentecunaca shujtajcunatami llaqui causaipi churashcacuna. Por ejemplo, huaquin gentecunataca yangamanta juchachishpami carcelpi churashcacuna. Achca huatacuna q’ui-pami imata mana rurashcata yachaj chayashpa carcelmanta llujchishcacuna. Chashna shina ruraicuna tiyajpimi gentecunaca shungupi nanarishpa p’iñarishcacuna. Pero, maipica Diosta servijcunapish llaquicunatami charishcanchij. Diosta servijcunapurapi ima llaquicuna tiyashcata ricushun.

#### **HUAUQUICUNA PANICUNA LLAQUICHISHCAMANTA**

<sup>4</sup> Diosta mana servijcunaca huaquin-pica ñucanchijtachari llaquichi tucun. Pero shuj huauqui o pani ñucanchijta o shujtajcunata llaquichishca laya ricurijpica ¿imatataj rurashun? ¿Diosmanta caruyashunchu?

<sup>5</sup> Tucucuna juchayujcuna cashcamentami pandarinchijlla. Chaimantami ima horapish shuj huauqui o shuj pani ñucanchijta llaquichi tucun. O ñucanchijpish shujtajcunatachari llaquichi tucunchij (1 Juan 1:8). Chai proble-

3. ¿Huaquin gentecunaca ima shinataj shujtajcunata llaquichishca?

4. ¿Huaquin-pica imamantataj Diosmanta caruyanata yuyanchijman?

5. ¿Shuj huauqui o shuj pani ñucanchijta o shujtajcunata llaquichijpica imamantataj mana mancharina canchij?

macunataca congregación ucupi mana tanto uyashcanchijchu. Pero chai problemacuna tiyajpica mana mancharinachu canchij. Diosmantapish mana caruyanachu canchij. Shuj hermano o shuj hermana llaquichijpish Diosmanta ama caruyangapajca Bibliapi mandashcacunatami cazuna canchij (Salmo 55:12-14).

<sup>6</sup> Huauqui Wili Deil ima tucushcata yuyarishun. 1931-pica Suiza llajta Betelpimi servi callarirca. Cutin 1946-pica Estados Unidos llajtapimi Escuela de Galaadman rirca. Graduarishca quipaca Suiza llajtaman tigrashpami superintendente shina servi callarirca. Cutin 1949-pica: “Ñucaca cazaragrini” nishpami sucursalpi caj huauquicunaman huillarca. Chashna huillajpica huauquicunaca: “Canca ña mana cashna servishpa catinguichu, precursor shinallami servishpa catingui” nircacunami. Chai huauquicunaca conferenciacunata cuchunpish mana saquircacunachu. Chaita yachashpaca achca huauquicuna panicunaca huauqui Wilitapish paipaj huarmitapish congregacionmanta llujshichishcata layami tratarcacuna, mana saludaracunapishchu.

<sup>7</sup> ¿Chashna tratajpica huauqui Wilica imatataj rurarca? Paipish paipaj huarmipish cazaranata Dios mana jarcashcataca allimi yacharca. Chaimantami Diosta mañarcacuna, paipi shunguta churashpa catirca-

6, 7. a) ¿Shuj huauquica ima llaquicunataj charirca? b) ¿Chai llaquicunahuan cashpaca huauqui Wilica imatataj rurarca?



cuna. Chai tiempopi huaquincunaca cazaranata Jehová Dios ima shina ricushcata mana tucuita entendircacunachu. Pero quipaca entendircacunami. Chaimantami huauqui Wilica ñaupa layallataj Diospaj pueblopi ayudai callarica. Diosmanta mana caruyashcamantami achca bendicioncunatapish chasquirca\* (urapi tiyaj notata ricui). Cutin, ¿shujtajcuna ñucanchijta chashnallataj llaquichijpica imatataj rurashun? ¿Mana p'ñarishpa Diosllataj chai problemacunata allichichun shuyashunchu? ¿o ñucanchijllatajchu chai problemacunata allichishun? (Proverbios 11:2; **Miqueas 7:7-ta leyipai**).

<sup>8</sup> Shuj huauqui o shuj pani ñucanchijta o shujtajcunata llaquichishcata yuyashpaca pandachari yuyacun-chijman. Juchayujcuna cashcamanta ima tucushcataca pandachari entendishca cashun. Mana cashpaca manachari tucuita yachashca cashun. Llaquichishca o mana llaquichishca cajpipish chai problemacuna tiyajpica Jehová Diostami mañana canchij. Shinallataj Diospi confiashpami paimanta mana caruyana canchij. Chashnami Jehová Dioshuan mana p'ñarishun (**Proverbios 19:3-ta leyipai**).

<sup>9</sup> Ñaupa punllacunapipish Diospaj

\* Huauqui Wilipaj causaimanta ashtahuan yachasha nishpaca, *La Atalaya* del 1 de noviembre de 1991-pi "Jehová es mi Dios, en quien de veras confiaré" nishcata ricui.

8. Ñucanchijta o shujtajcunata llaquichishcata yuyashpaca ¿imamantataj pandari tucunchij?

9. ¿Cai yachaipi catij yachaipipish imatataj yachashun?

pueblolica chashna laya llaquicunami tiyarca. Cai yachaipica Abrahampaj bisnieta Josemantami yachashun. Shinallataj paipaj huauquicunapaj culpamanta José achca llaquicunata charishcatami ricushun. Catij yachaipica rey Acabta, Jehová Dios imata rurashcatami yachashun. Shinallataj Antioquía llajtapi apóstol Pedro imata rurashcatapishmi ricushun. Paicunamanta yachacushpaca chashna laya llaquicuna tiyajpi Jehová ricushca shina ricungapaj, paimanta ama caruyangapaj imata ruranata yuyai. ¿Canta pi llaquichishcata yuyacunguichu? Chaita yuyashpaca cai yachaimi canta ayudanga.

---

## Juchayujcuna cashcamanta ima tucushcataca pandachari entendishca cashun

---

### JOSETA LLAQUICHISHCAMANTA

<sup>10</sup> Joseca alli shunguyujmi carca. Pero paica achca llaquicunatami ahuantarca. Paipaj huauquicunallataj llaquichijpimi ashtahuan llaquirirca. 17 huatacunata charijpica paipaj huauquicunaca esclavo cachunmi caturcacuna. Chashna c'atujpica Egipto llajtamanmi aparcacuna (Génesis 37:

10, 11. a) ¿Josetaca ima shinataj llaquichircacuna? b) ¿Prezupi cashpaca Joseca imallataj shuj c'ariman parlarca?



Shujtajcunamanta mana allita rimajpica problemaacunaca ashtahuanmi miraringa.  
(Párrafo 14-ta ricui).



23-28; 42:21). Egipto llajtapica, shuj huarmitami violashca nishpami Jotsetaca yangamanta juchachircacuna. Chaimantami mana juiciota rurashpa carcelpi churarcacuna (Génesis 39:17-20). 13 huataacunatami Joseca esclavo shina trabajashpa, carcelpipish pasarca. ¿Ñucanchijtapish huauquicuna, panicuna llaquichijpica ima shinataj Josepaj ejemplota cati tucunchij?

<sup>11</sup> José prezupi cajpica copacunata pasachijcunata mandajtapishmi carcelpi churarca. Shuj tutaca chai c'arica shuj muscuitami charirca. Paica imata muscushcatami Joseman huillarca. Dios ayudajpimi Joseca chai muscui imata nisha nishcata yacharca.

Chaimantami Joseca chai c'arimanca: 'Canca tigrami faraonpaj trabaja-gringui' nircami. Chashnallataj Joseca imamanta carcelpi cashcatami chai c'ariman parlarca. Chai c'ariman José imata nishcata, imata mana nishcatapish ricushun (Génesis 40:5-13).

<sup>12</sup> (Génesis 40:14, 15-ta leyipai). Joseca: 'Ñucaca shuhumushcami carcani' nircami. Josepajca chaica achca llaquimi carca. Joseca copacunata pasachijcunata mandajmanca: 'Carcelpi ñucata churachunca cai llajtapipish

12, 13. a) ¿Joseca paita llaquichishcamantaca imatataj rurarca? b) ¿Joseca copacunata pasachijcunata mandajmanca imatataj mana huillarca?

ñucaca ima mana allitaca mana rurashcanichu' nircami. Chashnallataj 'carcelmanta llujshichichun faraonman huillapangui' nishpami chai c'aritaca rogarca.

<sup>13</sup> ¿Joseca paita llaquichishcamentaca manachu imata rurashcanga? Joseca deganallamanta paita llaquichishcataca allimi yacharca. Chaimantami paita ayudachun nishpa chai c'ariman ima tucushcata parlarca. Pero, 'ñuca huauquicunami ñucataca shu-huashpa c'aturcacuna' nishpa, José parlashcataca Bibliapica mana huillanchu. Faraonmanpish mana huillarcachu. Ashtahuanpish paipaj huauquicuna Egipto llajtaman chayajpica Joseca paicunahuanmi alli tucurca. Faraonpish Josepaj huauquicunata alli chasquishpami cashna nirca: 'Cai llajtapi saquirichijlla, caipi imalla allicuna tiyashcacunatami cancunamanca c'asha' nircami (Génesis 45:16-20).

<sup>14</sup> Huauquicuna panicuna ñucanchijta llaquichishcata yuyashpaca mana shujtajcunaman huillashpa purinachu canchij. Pero shuj huauqui o shuj pani juchata rurashca cajpica ancianocunahuan parlashpami ayudata mashcana canchij (Levítico 5:1). Pero maipica mana juchata rurashpachu ñucanchijta llaquichishcanga. Chashna llaquichishca cajpica shujtajcunaman parlana mana minishtiringachu. Ancianocunamanpish ma-

14. Shuj huauqui o shuj pani ñucanchijta llaquichishcata yuyashpaca ¿paicunamanta mana allita ama parlangapajca imatataj rurana canchij?

nachari huillana minishtiringa. Ashtahuanpish paillahuan parlashpami alli tucuna canchij (**Mateo 5:23, 24; 18:15-ta leyipai**). Chashna llaquicuna tiyajpica Dios nishcata cazushpa, paimanta ama caruyashunchij. Huaquinpica ñucanchijta llaquichishcata yuyashpapish quipaca pandata yuyacushcatachari cuentata cushun. Ña cuentata cushpaca shujtajcunamanta ima mana allita mana rimashcamanta tranquilomi cashun. Ñucanchijta llaquichishca o mana llaquichishca cajpipish shujtajcunamanta mana allita rimashpaca mana imata japishunchu. Diostapish, shujtajcunatapish c'uyashpaca mana pitapish llaquichishunchu. Salmota quillcaj runaca: 'Ima pandata mana ruraj runaca mana llullacunata ninchu, shujtajcunamantapish mana allitaca mana parlancho' ninmi (Salmo 15:2, 3; Santiago 3:5).

---

## Joseca shujtajcunapaj pandarishcacuna Diosmanta caruyachichun mana saquircachu

---

### DIOSMANTACA AMATAJ CARUYASHUNCHIJCHU

<sup>15</sup> ¿Josemantaca imatataj ashtahuan yachai tucunchij? Joseca 13 huata-

15. ¿Diosmanta mana caruyashcamantaca Joseca imatataj ricurca?

cunatami llaquicunata apashpa causerca. Pero chai llaquicunataca Dios ricushca shinami paica ricurca (Génesis 45:5-8). Chaimantami Joseca Jehová Diosta mana juchachirca. Llaquicunata mana cungari tucushpapish mana llaquilla causarcachu. Ashtahuanpish shujtajcunapaj pandarishcacuna Diosmanta caruyachichun mana saquircachu. Joseca Diosmanta mana caruyashcamantami Diosllataj paipaj llaquicunata ima shina allichijta ricurca. Shinallataj paitapish paipaj familiatapish ima shina bendiciajtami ricurca.

<sup>16</sup> Ñucanchijpish José layallataj Diosmanta amataj caruyashunchijchu. ¿Manachu Jehová Diosta c'uyashcamanta paita alabasha ninchij? Ari. Chaimantami shujtajcunapaj pandarishcacuna Diosmanta caruyachichun manataj saquina canchij (Romanos 8:38, 39). Huauquicuna panicuna llaquichijpica José rurashca shinallataj Diospajman ashtahuan c'uchuyashunchij. Llaquicunatapish Dios ricushca shina ricushunchij. Shuj problema tiyajpica Bibliapi mandashca shina allichingapaj tucuita rura-shunchij. Chaita rurashca jahua mana allichirijpica Diospaj maquipi mingashunchij. Chashna rurajpica Diosllatajmi pai munashca shina, pai agllashca horaspi chai problemataca allichinga.

---

16. ¿Huauquicuna panicuna llaquichijpica imamantataj ashtahuan Diospajman c'uchuyana canchij?

## JEHOVÁ DIOSPI SHUNGUTA CHURASHUNCHIJ

<sup>17</sup> Cai llaqui punllacunapi causacushcamantaca, tucui laya llaquicunami ricuringa. Huaquinllapimi shuj huauqui o pani ñucanchijta o shujtajcunata llaquichishca laya ricuringa. Chashna laya ricurijpish Diosmanta ama caruyashunchijchu (Salmo 119:165). Ashtahuanpish Diospi shunguta churashpa, paita mañashpa, paipajman ashtahuan c'uchuyashunchij. Yuyarishun. Maipica juchayujcuna cashcamantaca imatapish pandami entendishca cashun o mana tucuita yachashcachu cashun. Ashtahuanpish José shina cashunchij. Pimantapish, imacunamantapish ama huashalla rimashunchij. Ima problema-cuna tiyajpish ama ñucanchij munashca shina allichishunchij. Diosllata servishpa catishunchij. Paillataj problema-cunata allichinata crishpa paciencia-huan shuyashunchij. Chaita rurajpica Joseta bendiciashca shinami ñucanchijtapish Diosca bendicianga. Diosca tucui cai pachapaj Juez cashcamanta, paipaj ñancunapish mana panda cashcamantaca siempre allita ruranga. Chaitaca tucui shunguhuanmi crinchij (Génesis 18:25; Deuteronomio 32:4).

<sup>18</sup> Ñaupaca Diospaj pueblolica shujtaj llaquicunapishmi tiyarca. Catij yachaipimi chai llaquicunamanta yachashun. Shinallataj Jehová Dios shina allita rurangapajca humildes, perdonajcuna cana cashcatami yachashun.

---

17. ¿Ima shinataj Jehovapi shunguta churashcata ricuchishun?

18. ¿Catij yachaipica imatataj yachashun?





## Llaquicunataca Jehová Dios ricushca shina ricushunchij

*“Mandaj Diospaj shutitami ñucaca cantasha. Pai rurashcacunapica ima panda mana tiyanchu” (DEUTERONOMIO 32:3, 4).*

ISHQUI millai runacunaca shuj runataca yangamantami juchachirca. Chaimantami paitapish paipaj huahuacunatapish rumicunahuan shitashpa huañuchirca. Chaita ricushpaca, ¿allita ruraj gentecunaca ima shinashi sintirishcanga? Caica mana shuj parlollachu can. Diosta servij Nabot runatami chashna llaquichircacuna. Rey Acab causashca punllacunapimi Nabotca causarca (1 Reyes 21:11-13; 2 Reyes 9:26).

<sup>2</sup> Cai yachaipica Nabot runa ima tucushcatami yachashun. Shinallataj ñaupá punlla congregacionpi shuj anciano imapi pandarishcatami yachashun. Chashnallataj Jehová shina cashcata ruraj cangapajca humildes, perdonajcuna cana cashcatami yachashun.

1, 2. a) ¿Nabot runataca ima shinataj llaquichircacuna? b) ¿Cai yachaipica ima shina canamantataj yachashun?

CANTOCUNA: 15, 2

**¿PI LLAQUICHIJPICA  
IMAMANTATAJ CAI  
VERSOCUNATA  
YUYARINA CANCHIJ?**

Deuteronomio 32:4

1 Pedro 5:5

Mateo 6:14

## NABOTTA LLAQUICHISHCAMANTA

<sup>3</sup> Rey Acabpish paipaj huarmi Jezabelpish yanga dios Baaltami adorajcuna carca. Jehovapaj mandashcacunataca mana cazujcunachu carca. Casi tucui israelitacuna paicunapaj rurashcacunata catijpish Nabotca Diosmanta mana caruyarcachu. Ash-tahuanpish Nabot runapajca Diospaj ñaupajpi alli canami ashtahuan valishca carca.

---

### Acab arrepintirijpimi Diosca: ‘Cantaca mana llaquichishachu’ nirca

---

<sup>4</sup> (1 Reyes 21:1-3-ta leyipai). Acab runaca Nabot charishca allpatami charisha nirca. Chaimantami Nabottaca: ‘Cambaj uva chagrayuj allpata ñucaman cui. Chai allpamantaca ashtahuan alli uva chagrayuj allpatami cusha. Mana cashpaca mashna cullquita nishcatami cusha’ nircami. Pero Nabotca: “¡Ñuca yayapajta japishca allpata canman cunamantaca Mandaj Dios huaquichichun!” nircami. ¿Nabotca imamantataj paipaj allpataca mana c’atusha nirca? Israelitacunaman Dios cushca leycunapica herencia allpataca mana c’atunallachu carca (Levítico 25:23; Números 36:7). Nabotca Diostami cazurca.

<sup>5</sup> Allpata mana c’atusha nijpica rey

3, 4. a) ¿Nabotca ima shina runataj carca? b) ¿Imamantataj allpataca Acabman mana c’atusha nirca?

5. ¿Allpata charingapajca Jezabelca imatataj rurarca?

Acabpish paipaj huarmipish mana allicunatami rurarcacuna. Chaimantami Jezabelca ishqui c’aricunata cachashpa Nabotta yangamanta juchachirca. Chashna juchachishcamantami Nabotapish paipaj hua-huacunatapish huañuchircacuna ¿Cai llaquita ricushpaca Jehová Diosca imatataj rurarca?

## DIOSCA CASHCATA RURAJMI CAN

<sup>6</sup> Chai ratomi Jehová Diosca profeta Eliastaca Acabta cashna nichun cacharca: ‘Canca shuhua, huañunchij runami cangui. Chaimantami Nabot huañushca shinallataj canpish, cambaj huarmipish, cambaj hua-huacunapish huañunguichij’ nircami (1 Reyes 21:17-25).

<sup>7</sup> Acab chashna rurashcamantaca Nabot-paj familiacunapish amigocunapish achcatami llaquirircacuna. Pero Dios chai rato justiciata ruragrishcata yachashpaca paicunaca allimi sintirishcacuna canga. Shinapish quipa punllacunapica humildecuna cashcata, Diospi tucui shunguhuan crishcatami ricuchina carca.

<sup>8</sup> Jehová Dios imata ruragrishcata uyashpaca ‘Acabca pai churarishca churanata lliquishpa, cañamazuta churarishpa, ayunashpa, cañamazullapitaj dormishpami llaquilla purirca’. Chashnami arrepintirishcata ricuchirca. Acab arrepintirijpica Diosca Eliastaca: “Chashna ñuca ñaupajpi cu-

---

6, 7. a) ¿Nabot runata huañuchishcamantaca Diosca Acabta imatataj rurasha nirca? b) ¿Nabotpaj familiacunapish amigocunapish imamantataj alli sintirishcacuna canga?

8. a) ¿Jehová nishcata uyashpaca Acabca imatataj rurarca? b) ¿Acab arrepintirijpica Diosca imatataj rurarca?

tirishcamanta pai causacujpirajca mana llaquichishachu. Paipaj churi mandacui punllapimi paipaj huasi familiataca llaquichisha” nircami (1 Reyes 21:27-29; 2 Reyes 10: 10, 11, 17). Jehová Diosca runacunapaj shunguta ricuj Diosmi can. Chaimantami Acabta perdonarca (Proverbios 17:3).

### HUMILDES CASHUNCHIJ

9 Acab huañushca quipami Jehová Diosca Acabpaj familiata llaquichisha nirca. Chaita yachashpaca Nabotpaj familiacunapish amigocunapish Diosta cuyashcata o

9. ¿Nabotpaj familiapish paipaj amigocunapish humildecuna cashpaca imatataj rurashcacuna canga?

mana cuyashcatami ricuchina carca. Paicuna humildes cashca cashpaca Diosmanta mana caruyashcacunachu canga. Ashtahuanpish Dios siempre allita ruraj cashcata crishpa, paipi tucui shunguta churashpami catishcacuna canga (**Deuteronomio 32:3, 4-ta leyipai**). Nabottapish paipaj huahuacunatapish Dios causachijpica paipaj familiapish amigocunapish achcatami cushicungacuna. Paicunaca Jehová Dios siempre allita ruraj cashcatami ricungacuna (Job 14:14, 15; Juan 5:28, 29). Diosca gentecuna tucui imallata rurashcatami ricuchinga. Allita rurashca cajpipish, millaita

---

¿Ancianocuna mana alli decidishcata yuyacushpaca imatataj rurashun?

(Párrafo 10 y 11-ta ricui).



---

## Humildes cashpaca Diosmanta mana caruyashunchu

---

rurashca cajpipish, pacallapi imata rurashcatapish ricuchingami. Humildes cashpaca chaitaca tucui shunguhuanmi crishun (Eclesiastés 12:14). Jehová Diosca ñucanchij mana yachashcatapishmi yachan. Chaimantami humildes cashpaca Diosmanta mana caruyashun.

<sup>10</sup> Ancianocuna ima decisionta japijpi ñucanchijpaj mana alli ricurijpica ¿imatataj rurashun? Por ejemplo, ñucanchij familiaria o rijsishcacunata o ñucanchijllataj Diospaj pueblopi huaquin asignacioncunata ña ama rurachun nijpica ¿imatataj rurashun? Shinallataj ñucanchij huarmita o ñucanchij cusata, churita, ushushita o shuj amigota congregacionmanta ancianocuna llujshichijpi, yangamantami llujshichishca nishpa yuyacushpaca ¿imatataj rurashun? Pi juchata rurashca cajpi arrepintirishcata ricushpa ancianocuna congregacionpi catichun saquiypica ¿ancianocunaca pandarishcami nishpa yuyashunchu? Chai ruraicunata congregacionpi ricushpaca, ¿Jehová Diospi confiaspaca catishunchu? Chashnallataj ¿Diosca paipaj pueblota alli pushacushcata crishpa catishunchu? ¿Chashna ruraicuna tiyajpica imamantataj humildes cana canchij? Ishqui yuyaicunata ricushun.

10, 11. a) ¿Imata ricushpataj Diosmanta caruyanata yuyanchijman? b) ¿Imamantataj humildes cana canchij?

<sup>11</sup> Puntapica humildes cashpaca tucuita yachashcata mana yuyashunchu. Tucuita yachashcata yuyashpapish, Jehová Dioslla gentecunapaj shunguta ricuj cashcatami yuyarina canchij (1 Samuel 16:7). Caita alli yuyarishpaca mana jatun tucushpami ñucanchij panda yuyaicunata cambiashun. Quipaca pi llaquichijta ricushpa o ñucanchijta llaquichijpica Diosta cazushpa paillataj chai llaquita allichichunmi shuyana canchij. Chashnami humildes cashcata ricuchishun. Bibliapica: 'Diospaj ñaupajpi cazushpa causajcunaca allimi causanga. Pero Diosta mana manchajcunaca llaqui tucushpami chingaringacuna' ninmi (Eclesiastés 8:12, 13). Caipi ricushca shinaca ñucanchijta o shujtajcunata llaquichijpipish humildesmi cana canchij (**1 Pedro 5:5-ta leyipai**).

### APÓSTOL PEDRO PANDARISHCAMANTA

<sup>12</sup> Ñaupá punllapica Antioquía llajtapi causaj huauquicuna panicunaca shuj llaquitami charircacuna. Paicunaca humildes cashcata, perdonaj cashcatami ricuchina carca. Paicunamanta yachashpaca ñucanchijpish perdonajcuna o mana perdonajcuna cashcatami ricushun. Shinallataj Jehová Diosca cashcata ruraj cashpapish paipaj munaita pajtachingapaj juchayuj gentecunata utilizaj cashcatami ricushun.

<sup>13</sup> Apóstol Pedroca tucucunapaj rijsishca shuj ancianomi carca. Paica Jesuspaj ami-

---

12. ¿Imamantataj Antioquiapi causaj huauquicunamanta yachagrinchij?

13, 14. a) ¿Jesusca Pedrotaca imata rurachuntaj cacharca? b) ¿Pedroca ima shinataj mana manchashcata ricuchirca?



gopishmi carca. Shinallataj sumaj rurai-cunatami Jesusmanta chasquirca (Mateo 16:19). Por ejemplo, huata 36-pica Cornelioman paipaj familiamanpish Diosmanta huillagri nishpami Jesusca Pedrotaca charca. Cornelioca mana judiochu carca, circuncisiontapish mana rurashcachu carca. Chaimantami Cornelioman huillagrínaca sumaj carca. Corneliopish paipaj familiapish espíritu santotami chasquircuna. Caita ricushpami Pedroca, Cornelio paipaj familiandij bautizarishpa Jesustacati pudishcata entenderca. Chaimantami Pedroca: ‘Paicunapish ñucanchij shinallatajmari jucha illaj espirítuta chasquincuna. Paicuna yacupi ama bautizarichunca ¿pitaj jarcangari?’ nirca (Hechos 10:47).

<sup>14</sup> Huata 49-pica apostolcunapish ancianocunapishmi Jerusalenpi tandanacurcuna. Chaipica mana judío crijcuna circuncionta rurana cashcata o mana rurana cashcata decidingapajmi tandanacurcuna. Pedropishmi chaipi carca. Pedroca ‘mana judiocuna circuncionta mana rurashca cashpapish espíritu santotami chasquircacuna’ nishpami parlarca. Pedro mana manchashpa caita parlajpica Jerusalenpi apostolcunapish ancianocunapish imata decidinatami alli yacharcacuna (Hechos 15:6-11, 13, 14, 28, 29). Pedro chashna parlashcamantaca judiocunapish mana judiocunapish achcatachari agradicircacuna. Shinallataj Pedropi ashtahuanmi shunguta churashcacuna canga (Hebreos 13:7).

<sup>15</sup> Jerusalenpi tandanacushca quipaca

15. ¿Antioquiapi cashpaca Pedroca ima shinataj pandarirca? (Página 21-pi tiyaj dibujota ricui).

Pedroca Antioquía crijcunata visitanamanmi rirca. Chaipi cashpaca mana judío huauquicunahuan panicunahuanmi pasarca. Chai huauquicuna panicunaca Pedro-mantaca achcatami yachashcanga. Pero shuj punllaca paicunahuan ña mana micusha nircachu. Pedro chashna rurajpica achcatami llaquirishcacuna canga. Shinallataj Pedro chashna rurajpica Bernabepish shujtaj huauquicunapishmi chashnallataj rurai callarirca. Pedro chaita rurashpaca huauquicunatapish panicunatapish ch’icanyachinmanmi carca. ¿Shuj alli anciano cashpapish imamantataj Pedroca chashna pandarirca? Congregacionpi shuj anciano mana allita rimashpa o imatapish rurashpa llaquichijpica ¿imamantataj Pedro pandarishcata yuyarina canchij?

---

## ¿Pedro mana judío crijcunamanta caruyajpica paicunaca imatataj rurarca?

---

<sup>16</sup> (**Gálatas 2:11-14-ta leyipai**). Pedroca shujtajcunata manchashpami chashna rurarca (Proverbios 29:25). Mana judiocunata Jehová Dios chasquishcata Pedroca allimi yacharca. Shinapish Jerusalenmanta shamuj huauquicuna imata yuyanata manchashpami mana judío crijcunamanta caruyarca. Apóstol Pabloca huata 49-pi mana judiocunata Pedro ima shina difindijtami

16. a) ¿Pabloca ima shinataj Pedrotaca cunarca?  
b) ¿Imatataj tapurina canchij?

ricushca carca. Chaimantami Pedrotaca: ‘Jerusalenpica mana manchashpami mana judiocunata difindircangui, ¿imamantataj cunanca chashna puricungui?’ nishpami rimarca (Hechos 15:12; Gálatas 2:13). ¿Pedro mana judío crijcunamanta caruyaipica paicunaca imatataj rurarca? ¿Diosmanta caruyarcacunachu? ¿Chashna pandarishpapish Pedroca Jesús mingashcata rurashpa catircachu?

### PERDONAJCUNA CASHUNCHIJ

<sup>17</sup> Pablo cunashcataca Pedroca allimi chasquirca. Pedro chashna pandarishpapish Jesús mingashcacunata runanata saquishcataca Bibliapica mana parlanchu. Ashtahuanpish Jehová Diosca ishqui cartacunata quillcachunmi mingarca. Chai cartacunaca Bibliapimi tiyacun. Shuj cartapicarin Pablotaca, “ñucanchij c’uyashca huauqui” nishpami Pedroca quillcarca (2 Pedro 3:15). Pedro chashna pandata rurajpica mana judío crijcunaca shungupi nanarishcachari sintirircacuna. Pero Pedro chashna pandarijpipish Jesusca shujtaj ruraicunatami paiman mingashpa catirca (Efesios 1:22). Jehovapaj, Jesuspaj ejemplota catishpami mana judío crijcunaca Pedrotaca perdonana carca. Shuj juchayuj runa pandarishcamanta mana judío crijcunapuramantaca shujllapish Diosmantaca manachari caruyarcacuna.

<sup>18</sup> Bibliapica tucuicunami pandarinchij ninmi. Chaimantami Apóstol Pablo cau-

17. ¿Dios perdonajpica Pedroca imatataj rurashpa catirca?

18. ¿Imallapitaj Jehová shina rurai tucunchij?

sashca punllacunapi shinallataj cunan punllapipish ancianocunaca huaquinpica pandarincunalla (Santiago 3:2). Pero ¿shuj huauqui ñucanchijta llaquichijpica imatataj rurashun? ¿Jehová Dios ricushca shinachu ñucanchijpish ricushun? Por ejemplo, shuj anciano shujtajcunamanta mana allita rimajpica ¿imatataj rurashun? Shuj anciano mana alli yuyashpa imatapish shujtajcunamanta rimajta ricushpaca ¿Diosmanta caruyanata yuyashunchu? ¿Chai huauquica mana ancianocho cana can nishpachu yuyashun? o ¿Jesús congregacioncunata pushacushcata crishpachu paipi shuyashun? ¿Chai huauqui pandarishcallatachu yuyarishpa catishun? o ¿chai huauqui achca huatacunata Diosta tucui shunguhuan serbishcatachu yuyarishun? Shuj huauqui ñucanchijta imata rurashca cajpi ¿anciano cashpa catijpi o ashtahuan rurai-cunata congregacionpi chasquiipica cushicushunchu? Paicunata perdonashpaca Jehová shinami allita rurajcuna cashun (**Mateo 6:14, 15-ta leyipai**).

<sup>19</sup> Diablomantami achca llaquicunata charinchij. Chaimantami Jehová Dios llaquicunata tucuchina punlla ña chayamuchun shuyanchij (Isaías 65:17). ¿Chai punlla chayamungacamaca imatataj rurana canchij? Ñucanchijta pi llaquichijpica imamanta chashna rurashcataca manachari tucuita yachashun. Pero tucui shunguhuanmi perdonana canchij. Chashna rurashpaca llaquicunata Jehová Dios ricushca shinami ricushun.

19. ¿Imatataj tucui shunguhuan rurana canchij?



## Tucui shunguhuan rurashpa Jehovata alabashunchij

*“Paicunapaj munaimanta macanacuiman llujshishcamanta, Mandaj Diostaca tucucuna alabaichij” (JUECES 5:2).*

JOBKA Diosta alli servij runami carca. Shuj punllaca quimsa runacunami paihuan parlanacunaman rirca. Chai runacunaca Elifaz, Bildad, Zofar shuticunami carca. Elifazca Jobtaca cashnami tapurca: ‘¿Runaca, yachaj cashpapis Taita Diospajca ima allita ruranchu? ¿Cashcata rurajmi cani, allita rurajmi cani nishcallamantachu, Diosca canpi cushicunga? ¿Chaimanta ima allita japingachu?’ nircami (Job 22:1-3). Elifazca ñucanchij rurashcacuna Diospajca mana valishcatami yuyarca. Chaimantami chashna tapurca. Cutin Bildadca Jobtaca ‘Diosca ni pita alli cashcata shina ricunchu’ nircami (**Job 25:4-ta leyipai**).

<sup>2</sup> Elifazpish Bildadpish Jobmanca Diosta servinaca yanga cashcatami crichisha nirca. Diospaj ñaupajpica polilla c'uru layallami canchij nircami (Job 4:19; 25:6). Chai runacunaca humildes cashca shinami ricurircacuna (Job 22:29). Ñucanchijca Diospaj ñaupajpi uchillami canchij. Shuj urcu

- 1, 2. a) ¿Elifazpish Bildadpish Diosta servinamantaca imatataj nircacuna?  
b) ¿Diosca cai quimsa runacunataca imatataj nirca?

CANTOCUNA: 40, 10

### ¿IMATATAJ YUYANGUI?

¿Diosca paita tucui shunguhuan servichun munashcataca ima shinataj yachanchij?

¿Tucui shunguhuan Diosta servijpi, pai bendiciaj cashcataca imamantataj cringui?

¿Shungumanta ayudajcuna Diospaj ñaupajpi achca valishca cashcataca imamantataj cringui?

jahuamanta ricujpi o shuj avionpaj ventanamanta ricujpica tucui imapish uchillami ricurin. Chashna ricushpami ñucanchijca uchilla mana imapaj valishca laya ricurinchij. Pero, ¿Diosca chashnachu ñucanchijta ricun? ¿Paita ashtahuan servingapaj achca esfuerzota rurajpipish mana valishcata shinachu ricun? Mana chashnachu ricun. Chaimantami Jehová Diosca Elifazta, Bildadta Zofartapish ‘cancunaca llullacunatami nircanguichij’ nircami. Quipaca Jobtaca canca ñucata ‘alli servij’ cashcamanta cushicunimi nircami (Job 42:7, 8). Tucui gentecunami Diospaj ñaupajpica achca valishca canchij.

### ¿DIOSMANCA IMATATAJ CUI TUCUNCHIJ?

<sup>3</sup> Elifaspish Bildadpish Zofarpish Jobhuan parlanacujtami joven Elihuca uyacurca. Chai runacuna parlashca quipaca Elihuca Jobtaca cashnami tapurca: ‘Cashcata ruraj cashpapish ¿imatataj paimanca cunguiyari? ¿Mana cashpaca imatataj cambaj maqui-mantaca Diosca japinga?’ nircami (Job 35:7). Elihú cashna tapushpaca ¿Diospaj ñaupajpi ñucanchij ruraicuna mana valishcatachu nisha nicurca? Mana. Elihú chashna tapujpica Jehová Diosca chai quimsa runacunata shina mana rimarcachu. Shinashpaca ¿Elihuca imataj nisha nicurca? Jehová Diosca paita adorachunca ni pita mana minishtishcatami nisha nicurca. Diosca ñucanchijmanta imata mana minishtinchu, imata rurajpipish paica mana ashtahuan charij tucungachu, mana ashtahuan poderyuj tucungachu. Ashtahuanpish ñucanchij imata rurai tucungapajca Diosmi

3. a) ¿Elihuca imatataj tapurca? b) ¿Chashna tapushpaca imatataj nisha nicurca?

yuyaita cushca. Paica ñucanchij alli ruraicunatami ricun.

<sup>4</sup> Ñucanchij huauquicunata panicunata cuyaita ricuchijpica Diosca ricucunmi. Paicunamanta ima allicunata rurajpica Diosca paimanta chashna ruracushca layami sintirin. Proverbios 19:17-pica cashnami nin: “Maijanpish huajcha runata llaquishpa imata cushpaca, Mandaj Diosman mañachishca shinami. Chai allita rurashcamentaca, cutichishcami canga” ninmi. Shujtajcunata llaquishpa imata cujpica Diosca ricunmi. Paica tucuita ruraj Diosmi can. Chashna jahuapish, shujtajcunamanta allita rurajpica paica ñucanchijman dibiyashca shinami sintirin. Chaimantami achcata bendiciashpa pagan. Jesuspish shujtajcunapaj allita rurajpica Diosca achcata bendiciaj cashcatami yachachirca (**Lucas 14:13, 14-ta leyipai**).

<sup>5</sup> Ñaupá tiempopica Diosca Isaiastaca ñucamanta huillagri nishpami mañarca (Isaías 6:8-10). Isaiasca cushicushpami: “Caipimi cani, ñucata cachahuai” nirca. Cunan punllacunapish Diosca paipaj ruraicunapi ayudachunmi mañan. Achca huauqui panicunami Isaiás laya ari nishcacuna. Maipi cashpapish, imata rurashpapish, sinchi ricurijpipish Diosta tucui shunguhuan servisha nishcacunami. Pero huaquincunaca cashnami tapurishcacuna: “Jehová Dios paipaj pueblopi ayudachun saquishcamantaca achcatami agradicini. Pero ¿Jehová Diosca ñuca rurashcata valichinchu? ¿Diosca paipajta mana rurajpipish manachu paillataj

4. ¿Shujtajcunamanta allita rurajpica Diosca ima shinataj sintirin?

5. ¿Ima tapucunamantataj yachagrinchij?



rurai tucunga?” nishpami tapurishcacuna. Cai tapuicunata cutichingapajca Barac runamanta Débora huarmimantapish ashata parlashun.

### AMA MANCHACHUN DIOS AYUDASHCAMANTA

<sup>6</sup> Baracca soldadocunata pushaj israelitami carca. Cutin Débora huarmica profetami carca. 20 huatacunatami Canaán llajtamanta rey Jabinca israelitacunata llaquichishca carca. Rey Jabinpaj soldadocunaca yallitaj millaicunami carca. Chaimantami israelitacunaca miticushca ucumantapish llujshinata mancharcacuna. Rey Jabinca 900 macanacuna carrocunatami charirca. Pero israelitacunaca macanacungapaj alli armacunataca mana charircacunachu (Jueces 4:1-3, 13; 5:6-8)\* (urapi tiyaj notata ricui).

<sup>7</sup> Rey Jabinpaj soldadocunahuan ricujpica israelitacunaca jahualla mishana layami ricurirca. Pero Jehová Diosca Débora huarmitami Baracman cashna nichun cacharca. ‘Tabor urcuman rishpa cambaj gentecunata tandachi. Neftalipaj, Zabulonpaj aillucunamanta, 10 mil c'aricunata canhuan richun tandachi. Ñucaca jatun mandaj Jabinpaj soldadocunata, mandaj Sisaratami Cisón jatun yacuman paipaj carrocunandij, soldadocunandij cambajman shamuchun yuyaita

---

\* Chai carrocunapaj ruedacunapica fierrocunatami churashca carca. Huaquinpica chai fierrocunaca hoces laya alli afilashcami cashcanga.

6. ¿Rey Jabinpaj soldadocunaca imamantataj jahualla mishana laya ricurirca?

7, 8. a) ¿Baractaca imata rurachuntaj Diosca mandarca? b) ¿Ima shinataj israelitacunaca rey Jabinpaj soldadocunata misharca? (Página 27-pi tiyaj dibujota ricui).

cugrini. Chaipimi paicunataca cambaj maquipimi churasha' nircami (Jueces 4:4-7).

<sup>8</sup> Macanacupaj gentecunata minishticushcata tucucunamanmi yachaj chayahishca carca. Chaimantami 10 mil c'aricuna Tabor urcupi tandanacurcacuna. Tandacushca quipaca chai 10 mil c'aricunaca Taanac shuti quingripimi Jabinpaj soldadocunahuan macanacunaman rirca (**Jueces 4:14-16-ta leyipai**). ¿Israel c'aricunataca Diosca ayudarcachu? Ari. ¿Ima shinataj ayudarca? Diosca animalta tamyachijpimi macanacuna pambaca ñapish lodoyarca. Chaimi Baracpish Israel c'aricunapish Haróset pambacunacama Sisaratapish, paipaj soldadocunatapish 24 kilometrocunata catishpa rirca. Harosetman manaraj chayahshpaca Sisarapaj carroca lodopi pambarithpa, mana puri tucushcamantami Sísara runaca Zaananim pushtucama callpashpa rirca. Chaiman chayahshpaca Jael huarmipaj carpa huasipimi pacaturca. Sísara runaca yallitaj shaicushca cashcamantami dormishca saquirirca. Jael chaita ricushpaca manchaita ladoman saquishpami Sisarataca huañuchirca (Jueces 4:17-21). Jehová Diosmi israelitacunata mishachirca\* (urapi tiyaj notata ricui).

### ISHQUI LAYA GENTECUNAMI TIYARCA

<sup>9</sup> Jueces capítulo 4-pi parlashca macanacuimantaca capítulo 5-pimi imalla tucushcata ashtahuan parlan. Por ejemplo, Jueces 5:20, 21-pica caitami nin: ‘Jahua pachamanta luzerocunapish macanacurcami.

---

\* Cai macanacupi imalla tucushcata ashtahuan yachangapajca *La Atalaya* del 1 de agosto de 2015, páginas 12-15-ta ricui.

9. ¿Jueces 5:20, 21 parlashca shimicunaca imatataj yachachin?

Luzerocunapish paicuna tiyanamantami Sisarahuan macanacurca. Cisón jatun yacu, p'ichajtami aparca' ninmi. Cai shimicunaca ¿israelitacunata angelcuna ayudashcatachu nicun? o ¿jahua pachamanta rumicuna tamyashcatachu nicun? Chaitaca Bibliaca mana huillanchu. Pero Jehová Diosmi minishtishca horaspi, chai pambapitaj animalta tamyachishpa israelitacunata ayudashcanga. Jueces 4:14, 15-pica quimsa cutinmi cai macanacuita Jehová Dios mishachishcata nin. Chashna tamyashcamantaca chai 900 carrocunaca pambarishpami mana puri tucurcacuna. Chai 10 mil c'aricunamantaca shujllapish 'ñucanchijllamantami cai macanacuitaca misharcanchij' mana ni tucurcunachu.

<sup>10</sup> Cai macanacuita mishashca quipa ima tucushcata ricushun. Deborapish Baracpish Jehová Diosta alabangapajmi cashna cantarcacuna: "Mandaj Diospaj angelca: 'Meroz llajtataca llaqui tucushca canman nichij. Chaipi causajcunataca jatunta llaquichishcataj cachun nichij. Paicunallatajmi Mandaj Diostapish paipaj soldadocunatapish mana ayudarcacuna'" nishpa cantarcacuna (Jueces 5:23).


<sup>11</sup> Merozca llaqui tucushca cachun nishcamantami cai pushtuca tucui chingarishcanga. Meroz llajtapi causajcunaca manachari Baracpaj soldadocunahuan macanacunaman risha nishcanga. Yuyarishun, 10 mil c'aricunami cananeocunahuan macanacunaman rircacuna. Merozpi causajcunapish macanacunaman rina cashcatami uyashcacuna canga. Shinallataj cai llajta-

10, 11. ¿Meroztaca imamantataj llaqui tucushca cachun nishpa cantarcacuna?

tachari Sisarapish pasashca canga. Sísaraca callpashpa pasacujta ricushpaca Meroz gentecunaca paita japinachari carca. Pero japinapaj randica ricushpallami saquirishcacuna canga. Jehovata ayudanapaj randica cai gentecunaca mana imata rurarcunachu. Imata rurashca cajpica Jehová Diosca bendicianmanmi carca. Meroz gentecunaca mana Jael huarmi shinachu carca. Jael huarmica mana manchashpami Sisarata huañuchirca (Jueces 5:24-27).

<sup>12</sup> Barac runahuan rij 10 mil c'aricunaca macanacunaman mana rij gentecuna layaca mana carcachu. Baracpish Deborapish Israel soldadocunata pushajcuna 'paicunapaj munaimanta macanacuiman llujshishcamantami' felicitarca. Chai 10 mil c'aricunaca 'yuraj burrocunapi purijcuna' shina importante gentecuna laya mana yuyarcunachu. Bibliapi nishca shinaca chai importante casha nij gentecunaca 'alfombrapi tiyarijcunami carca, maimanpish chaquillahuan purijcunami' carca. Chai gentecunaca paicunalla alli causanata munajcunami carca. Pero macanacunaman rij 10 mil c'aricunaca paicunapaj munaimantami rumi junda Tabor urcupi, Cisón quingripi macanacunaman rirca. Cutin alli causanata munaj gentecunataca 'yuyarichij' nishpami Baracpish Deborapish sinchita rimarcacuna. Jehová Diosta ayudai pudishpapi mana imata rurashcamantami chashna rimarcacuna (Jueces 5: 9, 10, NM). Cunan punllacunapish, "¿Diosta servingapajca imatataj rucacuni?" nishpami alli yuyarina canchij.

12. a) ¿Jueces 5:9, 10-pica ima ishqui laya gentecunamantataj parlan? b) ¿Imatataj cai versocunapica yachanchij?



Manaraj ima decisionta japishpami ñuca familiapajpish, huauqui panicunapajpish allichu canga nishpa yuyarina canchij. (Párrafo 15-ta ricui).



<sup>13</sup> Macanacuiman rij 10 mil c'aricunaca Jehová Dios tucuicunamanta yalli alli mandaj cashcatami ricurcacuna. Shinallataj 'Dios mishachishcatami' shujtajcunaman parlai tucurcacuna (Jueces 5:11). Pero Rubén, Dan y Aser familiacunaca Diosta servinapaj randica paicunapaj animalcunata atindishpalla, barcocunapi trabajashpallami causajcuna carca (Jueces 5:15-17). Cutin Zabulón y Neftalí familiacunaca huañuna cashpajpish Deboratapish Baractapishmi ayudarcacuna (Jueces 5:18). ¿Imatataj caipica yachashcanchij? Jehová Dios ayudachun minishtijpica partecunaca ayudasha nircacunami, pero caishuj partecunaca mana ayudasha nircacunachu.

**“DIOSTACA TUCUICUNA ALABAICHIJ”**

<sup>14</sup> Cunan punllapica Jehová Diosta ayu-

13. a) ¿Rubén, Dan, Aser familiacunaca ima shinataj causajcuna carca? b) ¿Zabulón, Neftalí familiacunaca ima shinataj carca?

14. ¿Cunan punllapica ima shinataj Jehová Diosta apoyanchij?

dangapajca mana macanacunaman rinachu canchij. Mana manchashpa cushicuihuan Diosmanta yachachishpami Diosta apoyanchij. Cunancarin Diosta ashtahuan servingapajmi esforzarina canchij. Achca huauqui panicunaca ch'ican ch'ican ruraicunapimi Diospaj pueblopi servicun. Por ejemplo, achcacunaca precursorcuna, betelitacunami can. Mana cashpaca Tandanacuna Huasicunata shayachishpami ayudancuna. Cutin shujtajcunaca jovencuna cashpajpish, yuyajcuna cashpajpish jatun tandanacuicunapimi ayudancuna. Huaquin ancianocunacarin Comités de Enlace con los Hospitales nishcacunapi, jatun tandanacuicunatapish organizashpami ayudancuna. Maipi cashpajpish imata rurashpajpish paita servinata munajpica Jehová Diosca cushicunmi. Ñucanchij alli rurashcacunata manataj cungarinchu (Hebreos 6:10).

<sup>15</sup> Tucuicunami Diosta ashtahuan servin-

15. ¿Diosta mana tucui shunguhuan servicushcataca ima shinataj yachai tucunchij?

gapaj imata ruracushcata ricuna canchij. Chaimanta, “¿ñuca rurana trabajotaca shujtajcuna rurachunchu saquini? ¿Diosta servinata yuyanapaj randica cosascunata charinallapichu yuyacuni?” nishpa yuyarishunchij. Chashnallataj “¿Barac shina, Débora shina, Jael shina, 10 mil c'aricuna shinachu mana manchashpa tucui ñuca charishcacunahuan Diosta servicuni?” nishpami yuyana canchij. Ashtahuan alli causasha nishpa cullquita ganangapaj ¿caru llajtacunaman rinata yuyacunguichu? Chaita rurasha nicushpaca: “Ñuca familiapajpish, huauqui panicunapajpish, caita rurana alli canata o mana alli canata entendichihuai” nishpa Diosta mañanami cangui\* (urapi tiyaj notata ricui).

<sup>16</sup> Jehová Diosca paita ayudachunmi invitan. Adán y Eva causashca punllamantami Diablocata gentecunata Diosmanta caruyachisha nishca. Pero Jehová Diosta apoyashpaca paipaj lado tucushcatami ricuchishun. Diospi tucui shunguhuan crishcamantami paita apoyasha ninchij. Chashnami Jehovata cushichinchij (Proverbios 23:15, 16). Ñucanchijcuna tucui pi cazujpica Diablo nishcacuna llulla cashcatami Diosca ricuchi tucunga (Proverbios 27:11). Tucui pi cazujpica paica allimi ricun.

\* *La Atalaya* del 1 de julio de 2015-pi “Ansiedad por la economía” nishca temata ricui.

16. ¿Jehová Diosmantaca imatataj rurai tucunchij?

<sup>17</sup> Ñallami Diosta servijcunalla cai Allpatica causanga. Chai punlla chayamuchunmi shuyacunchij. Ñucanchijpish Débora, Barac shinami sintirishun. Paicunaca: “Mandaj Dioslla, canta piñajcunaca tucucuna chingarishca cachun. Canta c'uyajcunaca achijlla inti llujshicuj shina ashtahuan achijyachicuj cachun” nishpami cantarcacuna (Jueces 5:31). Cai mundopi tiyashca mana alli ruraicunata Jehová tucuchijpica Débora, Barac shinami sintirishun. Armagedón callarijpica Diosca paipaj enemigocunata tucuchingapajca gentecunapaj ayudataca mana mañangachu. Ashtahuanpish casijlla shayashpami Jehová Dios ima shina ‘quishpichijta ricushun’ (2 Crónicas 20:17). Chai punlla chayamungacamaca mana manchashpa cushicuihuan Jehová Diosta apoyashpa catishunchij.

<sup>18</sup> Macanacui tucurishca quipaca Deborapish Baracpish Jehová Diosllatami cantashpa alabarcacuna. Paicunaca: “Tucui israelcunapish paicunapaj munaimanta macanacuiman llujshishcamanta, Mandaj Diostaca tucucuna alabaichij” nishpami cantarcacuna (Jueces 5:1, 2). Ñucanchijpish Dios munashca shinami servi tucunchij. Chashna rurajpica shujtajcunapish chashnallatajchari Diosta servisha ningacuna.

17. ¿Jueces 5:31-pica quipa punllacunapica ima tucunataj yachachin?

18. ¿Diosta tucui shunguhuan servijpica shujtajcunapish imatataj rurasha ningacuna?



Cai revistatapish shujtaj publicacioncunatapish gratis surcui



Shinallataj español shimipi Traducción del Nuevo Mundo Bibliata internetpi rezai

jw.org paginaman yaicui o cai codigota escaneai



w17.04-QIC  
161226